


# **THERAPIA PURPUREAE** **RECEPTIORI TUTIOR** **SOLIDIORQUE.** ---

QUAM  
 CONSENSU AMPLISSIMI SENATUS  
 ET  
 ANNVENTE GRATIOSA FACULTATE MEDICA  
 PRO  
 SUSCIPienda PROFESSIONE EXTRAORDINARIA  
 PUBLICE VENTILANDAM PROPONIT  
**DAVIDES MAVCHART,**  
 MEDICINAE DOCTOR,  
 ILLUSTR. STIPEND. DVC. ET SEMINAR. BEBENHVS. MEDICVS,  
 CIVITAT. TVBING. EIVSDEMQUE ET BEBENHVS.  
 PRAEFECTVRAE PHYSICVS ORDINARIVS,  
 RESPONDENTE  
**ALBRECHT. FRIDER. FAVLHABER,**  
 MED. CANDIDATO,

DIE SEPTEMB. MDCCLXII.



TVBINGAE  
 LITTERIS ERHARDIANIS.

# THEATRA PVRBIA

REPERTORIUM

1707

1707

1707

1707

1707

1707

1707

1707

1707

1707

1707

1707

1707

1707

1707

1707





## PRAEFAMEN.


**L**eges academicæ postulant, ut specimen edam  
inaugurale pro auspizando munere Professo-  
ris extraordinarii, SERENISSIMI nostri  
DVCIS clementia mihi collato.

De *themate* e diviti rerum medicarum penu seligendo  
sollicito mihi subiit *novior*, *tutior* æque ac *solidior purpuræ*,  
morbo tam frequenti atque ancipiti, *medendi methodus*,  
digna omnino, quæ hac occasione publicæ Eruditorum  
disquisitioni subjiciatur. Equidem me non latet, tot jam  
de purpura lucem aspexisse scripta, ut videri possit,  
crambem hic centies coctam recoqui. At enim vero qui  
de ea, quam propositurus sum, methodo vel aliquid,  
vel quod recentioribus in hac re experiētiis condignum  
esset,





esset, enucleatius proposuerit, equidem novi neminem. Neque vero *methodum* hic publicandam *novam* novatuliendi studio dico moliorve solo, hoc nomine in publicum protrudere. Quin imo si quis antiquitatis usque studiosus existeret, ut vel ipsa novitatis vox illum offendere possit, illi multum repugnabo non ego. Modo, quam in usus publicos producere constitui, purpuræ therapiam certam, tutam, & receptiori certiore, tutiorem, solidioremque esse haud neget, aut, quam neget, prius ipse tentet & casta se convinci patiatur experientia. Planissimæ certe tritissimæque omnibusque facile obviæ experientiæ clinicæ praxesque medicæ æque ac theoriæ physiologicæ, anatomicæ ac pathologicæ recentiores non solum verum etiam veteres & vetustissimæ adeo, quam commendabo, purpuræ methodum abunde confirmant. *Diuretica* illa est, vel si mavis, *diapnoico-diuretica*. Diuretica autem fuerunt remedia diætetica, pharmaceutica & chirurgica, quæ ab Hippocratis ad nostram usque ætatem omnibus aliis tutiora atque efficaciora purpuræ tam præcavendæ quam curandæ subsidia comperta sunt, ut mirum sane, ad tantam theoriæ & experientiæ lucem non citius magisque innotuisse cultamque fuisse hanc purpuræ medendi methodum. Atat excipis, L. B. si itaque cognitus fuit diureticorum in purpura usus, si usque notus fuit felix horum in illa eventus, ex concessis nil novi erit in hac purpuræ therapia. Diuretica cognita erant, respondeo, quia usurpata, sed neutiquam qua talia, verum alio nomine, alio fine. Id quod vel  
foli



foli vulgo sic dicti *pulveres antispasmodici*, nomine tenus potius tales, & reapse diuretici, quia falsi, maxime quia nitrosi, demonstrant. Taceo *vesicatoria*, utpote fortissima diuretica, & consimilia. Hunc eorum effectum si ob oculos habuissent, profecto dudum apertius explicuissent, adplicuissentque hanc usitatæ præferendam purpuræ therapiam. Verum aut surdus sum, aut altum apud alios de hac est silentium. Neque tamen eapropter ego hic is esse volo, qui primus solusque hæc talia eloquitur. Ingratissimus etenim essem, nisi ingenue faterer, me hanc medendi rationem debere jucundissima affinitatis necessitudine mihi conjunctissimo Domino Doctori SIGWART, spectatissimo p. t. Facult. Med. Decano ejusdemque Seniori venerando. Num is primus solusve hujus medelæ fit Autor, equidem nescio, quia id ipsemet a me interrogatus nescit, prope dixerim, nescire vult. Hoc saltem scio, illum jam plus tria lustra Stuttgartiæ posteaque nos inter in amplissima sua Praxi hanc adoptasse semperque comprobata habuisse medendi methodum, quam præterea in suis prælectionibus practicis operose inculcavit commendavitque Auditoribus suis. Memini illum in partes hujus veritatis traxisse egregie consentientem ERNEST. IER. NEVEELDUM, qui in Physiologia sua eruditissima (quis vero in hac hæc talia quæsierit?) hanc utut obiter & in transcurso tantum attingit purpuræ therapiam, atque ingenue fatetur se antea in purpuræ curatione infeliciorem, illius demum manu ductione feliciorum redditum fuisse. Operæ pretium est omnino, ut





integrum tanti viri testimonium ex ipsius Physiologia ad pathologico-therapeuticum forum transferamus, præsertim cum ibi illud vix quis quæsi-  
verit. Ita vero laudatus vir in *Specimine I. Physico-medico de secretionibus humorum in genere ejusque præfatione*: *Materia morbi nequit pelli de corpore, nisi id fiat ope secretionis. Qui igitur recte mederi vult morbis, debet non solum naturam materiae cognoscere expellendæ, verum etiam scire, per quænam organa secretoria, quibusnam remediis expellere, h. e. debet secretionis intelligere mechanisum. Sit enim materia peccans salinæ indolis, in latice aquoso hærens, morbus ex ea natus potius augetur quam minuitur, quando Medicus per sudorifera, purgantia &c. eam evacuare intendit. Scopum melius obtinebit, quando per renes eam expellere conatur materiam, crassiores enim ipsius partes per eos facilius transire possunt. Hujus vero necessitatem medicus vix quidem intelligit, nisi sciat, quænam sanguinis partes ex propria natura facilius vasa renalia transeant. Ex harum natura cognita prius ipsi, indicationem si format. Difficile vero hanc potest explere, nisi leges secretionis notas habeat atque perspectas, simul. Potest enim copia liquidi secer-  
nendi in glandulis renalibus multis modis augeri. Non solum enim augetur secretio urinæ, dum, eadem manente constitutione ipsius sanguinis, sola vasa renalia relaxantur, vel sanguinis partes majores in minores solvuntur, verum etiam dum acre temperatur, atque stimulantium ope vasa in citatiores contractiones cientur, & major copia liquidi eodem tempore per vasa renalia transprimitur. Hæc vero*  
omnia





omnia facile determinantur ex iis legibus secundum quas liquida nostri corporis per vasa minora moventur, quas medicus omnino intelligere debet, ut secretionem unius liquidi augere, alterius minuere valeat, prout causa ipsius morbi id ita requirat. Exemplo res clarior evadit. Purpuræ vesicularis, nobis epidemica, habet causam materialem in sanguine, propriæ naturæ instinctu per emunctoria cutis expellenda. Licet vero sæpe hic quidem morbus remediis tollatur diaphoreticis, sancte tamen adfirmare possum, sæpissime necesse fuisse, materialem morbi causam ad renalia emunctoria derivare, eamque de corpore expellere. Sit enim corpus, ubi sudoris defectus impediat purpuræ eruptionem, uti quidem multoties id mihi observare contigit. Quando deficit sudor, signum hoc est, materiam peccantem libere ultimas, quæ in cute externa locantur, vasorum angustias transire non posse. Causa transitus impediti est, vel angustia vasis, vel moles adaucta materiæ transeuntis. Utrumque parit obstructionem. Prior causa, quo modo tollenda, nunc quidem determinare non expedit. Altera vero, præter diluitionem, frictionemque, revulsione versus renum emunctoria, sublata sæpe. Regioni itaque lumbari, atque pubis cataplasmata emollientia superdari jubeo, regimen prohibeo diaphoreticum, atque interne salia media sumenda, præscribo. Cataplasmatibus resistantia minuitur in vasis renalibus, salibus vero, acrimonia sanguinis non solum obtunditur, verum etiam molecule concretæ ab mutuo contactu solvuntur, & vascula arteriosa idcirco, ad citatiorem motum irritata, laticem aquosum hac materia inbutum, majori copia per locum






locum minus resistentem, nimirum vasa renalia, pellunt, h. e. diuresin augent. Hoc vero dum fit, inpetus humorum versus cutis emunctoria minuitur, adeoque vascula subcutanea proprio elatere in pactam retro urgent materiam in vasa majora, in his vero attenuatur illa atque apta exadit circulando per vascula priora nunc quidem depleta atque aperta. Hinc excretio purpuracei exanthematis obtinetur, placidusque erumpit sudor. Nisi habuissem cognitae mechanicae secretionis humorum leges, in hanc forte non incidissem medendi methodum. Nec quidem reticendum puto, periusse nonnullos, qui hoc laborarunt morbo, antequam cogitare licuit mihi de hac methodo. Facile quoque ratio intelligitur; dum enim vi cordis propellente sanguinem, materia morbi in vasis cutaneis augetur, atque accumulat, obstructio pertinacior fit. Materia morbi tandem versus præcordia pulsa, magnam cordi fert resistentiam, ipsiusque exstinguit motum. Adcedit, quod vascula encephali, sanguine & succis nimis repleta atque distenta, separationem liquidi vitalis, ceu causam motus muscularis, impediunt, ipsæque impuritates, acrimonia sua, tenerrima cerebri vascula destruant, mortemque creent. Ab eo igitur tempore, quo hanc methodum fui expertus, semper soleo primos dies morbi exhibere diuretica; his enim materiam morbi minui, eruptionemque facilitari, crebra me docuit experientia. Hæc eum in finem adducere volui, ut L. B. intelligat, me non pro eo haberi velle, qui primus solusve de hac materia scripserit aliquid. Nil enim magis invidiosum mihi esse videtur, quam alienis superbire plumis, quam insolentiam plane repudiat ingenuum veri-





veritatis studium. Quod intendo, hoc tamen tantum est. Detectam cultamque a laudatis Duumviris theoretico-præcticam doctrinam litteris nondum debite tractatam esse constat. Dignam illam esse, quæ publici juris fiat, meliusque exploretur, nemo ibit inficias. Publicabo illam, & publico subjiciam Eruditorum examini. Id facere potero eo majori jure, cum non modo in amplissima venerandi Domini AFFINIS mei praxi, cui olim interesse mihi licuit, sed & postea in castris, ubi proprio Marte cum sanitatis hostibus mihi pugnandum erat, ubi per quinquennium Medici castrensis munere & onere premebar, de felicissimo hujus methodi eventu satis superque certior factus, propria experientia confirmatum habeam, quod in publicos usus hic protrudere allaboro. Accedit prælibatis instituti rationibus hæc denique: Nullus fere morbus, nullum prope morborum symptoma nostros intra muros tam frequens esse observatur, quam purpuraceum exanthema, ut parum absit, quin endemium nobis dici possit hoc malum. Quam igitur felices sumus, si nulla alia methodo, quam indicanda, feliciter præcaveri & curari potest hoc malum, si, addo, nullus fere morbus curatu adeo facilis, quam purpura methodo illa. Nullum proinde officio meo convenientius, nullum inter nos excussu illo dignius thema esse existimavi. Neutiquam vero plenam heic quis expectet de purpura tractationem. Ea saltem nunc attingere consultum erit, quæ ad indicatum scopum præsentem aliquid conferre poterunt. Dirigat summus salutis nostræ Auctor qualescunque conatus nostros in sui nominis



gloriam, in ægrotorum miserorum solamen, & in artis salutaris incrementa.

\* \*      \* \*      \* \*

### §. I.

**P**urpuræ varia est acceptio, justo certe latior, qua petechias & febres petechiales comprehendunt. NEVCRANZIUS integrum de purpura conscripsit tractatum, qui vero præter *petechias* descriptas nil continet. LAZARUS RIVERIUS in *operibus medicis universis* pariter maculas purpureas & febres purpuratas pro petechiis & febribus venditat petechialibus, has ita describens: *Dantur maculæ purpureæ, quæ in toto corpore apparent, ac præcipue in lumbis, pectore & dorso, morsibus pulicum plerumque similes, quæ peticulæ seu petechiæ ab Italis vulgo nominantur, & febres, hoc comitatæ symptomate, purpuratæ seu petechiales nominantur.* Distinguit autem ille maculas purpureas ab exanthematibus purpureis, quæ exanthemata cum nostris certe conveniunt, inquiens in *Prax. medic. Lib. XVII. Exanthemata a maculis purpureis differunt ex eo, quod maculæ ad qualitates mutatas ipsius cutis, cum nullo modo emineant, exanthemata vero ad tumorum genera referantur. Sunt granis milii similima, aliquando rubra, aliquando alba.*

### §. II.

Mitto litem illam, utrum purpura pro novo morbo sit habenda, an vero veteribus jamjam cognita fuerit.

Ut





Ut causas morborum, ita morbos quoque a primævis derivandos esse existimo. Tam novum autem esse hoc mali genus, ac vulgo creditur, certe erroneum est. In *Epidem. Hippocr.* adeo illius vestigia reperiri Auctor est ZACVTVS LVST. *Lib. II. Hist. med.* ubi præter illa *κεγκρώδεα γρηχισμαλα*, five *aspredines miliaceas*, quas HIPPOCRATES in *Epidem Lib. II. S. III.* *ἐξανθήματα μικρά* appellabat, etiam febres malignas & miliares non secus, ac puncticulares, GRAECIS antiquioribus cognitae fuisse ostendere annisus est. Neque hic multum dispiciendum erit, sitne purpura eadem cum CELSI *aspredine*, aut PLINII *uredine*, aut VEGETII & APVLEII *urigine*? Vid. LOCHNER *Ephem. germ. L. 6. obs. 96.*

### §. III.

Purpura de cutis morborum familia est, & peculiæres ipsius constituit efflorescentias. Exanthemata technice dicuntur ejusmodi eruptiones cutaneæ. Purpura itaque vi proximi generis sui exanthema est. Differentiam specificam hujus morbi a quantitate, figura, ambituque hujus exanthematis haud male petunt Pathologi. Sunt enim pustulæ, quantitate sua grana milii non superantes, unde febris miliaris nonnullis dicitur, figura sua in apices extenuatæ, & ambitu suo universam corporis peripheriam occupantes. Reliqua discrimina vel superflua censentur in hac purpuræ idea, vel æquivoca sunt. Adæquatio enim idearum totalium non defectum modo, sed & excessum notionum partialium respuit.



## §. IV.

A purpura proinde differt febris purpuracea, quæ inde suum accipit nomen, tantoque magis ab illa distinguenda est, cum constet ab experientia, purpuram etiam existere sine febre, atque præterea expediat in ipsa praxi hoc solícite observare discrimen, & dispicere, utrum hæc illius sit causâ, an effectus; quin methodo nostra haud raro liceat purpuram cum febre mutare in purpuram sine febre. Cujus rei luculentissimum pridie mihi recensuit, cui affinitatis vinculo devinctus sum, spectatissimus Dominus Decanus, exemplum in optimæ spei filio REVERENDISSIMI DOMINI NOSTRI CANCELLARII, cui febre peracuta correpto præfagiebat purpuram, ideoque antifebrilibus miscebat antipurpuracea heic commendanda. Erumpebant pustulæ purpuracæ confestim quidem & tanto agmine, ut in collo, dorso & pectore pustulæ pustulis insidere viderentur. Emicabant deinde in artubus, sed parciores; pulsus ab initio celerrimus & frequentissimus redibat in naturalem, tum sine febre purpura obsitus ab omnibus periculosis symptomatibus immunis decumbebat, tandemque lætiori sanitati restituebatur, nullis mali reliquiis relictis.

## §. V.

Purpura proinde utiliter recteque dividitur in duas species; purpuram nempe chronicam & acutam. Quæ posterior demum denuo subdividenda est in benignam & malignam. Namque chronica omnis benigna est, licet non





non omnis benigna sit chronica, quemadmodum nec omnis acuta mox maligna existit. Definitiones harum purpuræ specierum ex indicatis varietatis earum fundamentis facile elucescunt. Purpura nempe chronica ea audit, quæ sine febre existit: acuta, quæ febrem conjunctam habet. Purpura benigna vero est purpura acuta non putredinosa, maligna contra acuta putredinosa.

#### §. VI.

A colore purpura aliâs dividitur in rubram & albam. Divisio vero in symptomaticam & idiopathicam aut nullo sano gaudet sensu, aut erronea est. Indicatas vero divisiones maxime utiles esse & necessarias, tam certum est, quam certum, longe aliam cujusvis speciei semper esse curationem. Quantum, quæso, ut hoc unicum addam, discrimen infert in praxi benigna & maligna, in quarum priori sanguis e vena missus observatur spissus, qui contra in posteriori deprehenditur attenuatus & quasi fusus.

#### §. VII.

Ex indicatis purpuraceum exanthema facile distinguitur a quovis alio. Ab eruptione scarlatina ex eo dignoscitur, quod hæc maculas seu potius parvas pustulas, mox latecentes & intense rubras, maculas latiores prope confluentes exhibeat; a petechiali, quod hæc minoris sit ambitus, maculisque a morfu pulicum relictis haud absimilis; a morbillosa, quod hæc exanthemata la-



tiora sint & elatiora; ab urticata, quod in hac exanthemata pariter extantiora latioraque minusque æquabilia. FRIDER. HOFFMANN in *System. Medic. ration. T. IV. p. 92.* differentiam purpuræ rubræ & albæ non ex colore tantum, sed ex varia conformatione depromit, rubram habere, dicens, vesiculas magis vel minus latas, quæ liquorem contineant; albam vero nullas habere vesiculas, sed nodulos profunde in cute hærentes, milii figuram referentes, ad tactum asperos, humore spissiusculo quasi purulento infarctos.

#### §. VIII.

Differt etiam quodammodo purpura alba, quam nonnulli inde dividunt in strictius dictam, & pellucidam seu crySTALLINAM. Verum levioris momenti est hoc discrimen. Quod pariter agnovit Excellentissimus IO. GE. GMELIN, etiamnum post fata colendus, in *Dissert. de febre miliari*, qui operæ pretium non esse reputat, albam a pellucida distinguere, cum ratione decursus morbi exigua sit differentia.

#### §. IX.

Tantum pro fine nostro de hujus mali notione & varietate. Nosologica hæc excipiant quædam ætiologica, symptomatologica, & semiologica, tam dignosin quam prognosin concernentia.

#### §. X.

Causas tollere est morbos curare. In purpuræ itaque causas nobis inquirendum est, si quidem felices manus





nus auxiliatrices ipsi applicare velimus. Tantum non omnes accusant materiam aliquam inquinantem, irritantem, fermentescentem. B. ALEX. CAMERARIUS in *Diff. de purpura alba majori an.* 1723. *Tubingæ* habita scribit: *Speciem hujus objecti naturæ humanæ adversi & noxii exprimere, cujus originis sit, mineralis, vegetabilis, aut animalis, seu differentiam specificam pro diversitate exanthematum determinare, quum suam hîc ignorantiam fateantur, qui magis sapere videntur, quis a nobis postulabit?*

§. XI.

Sed hic, quod sæpius alibi accidit, naturæ mysteria quærunt, ubi nulla sunt, & ubi sunt, omnia plana & explorata esse reputant. Phænomena macrocosmi & microcosmi persæpe, concedo, abstrusa sunt, sæpe occulta plane. Phænomenologia nostra, porro largior, in causarum & causalitatum (veniam petit terminus, utpote nisi bene latinus, philosophicus tamen & technicus) indagine ad ultima rerum principia ascendere nequit, neque in toto suo cum universo nexu ambituque comprehendere potest, adhibito tamen diligentiori scrutinio plura, ac vulgo creditur, capit. Quin mireris, aquam multis sæpe hærare in rebus sponte fluentibus & facile obviis. Hinc est, quod in ætiologiis nostris quoque toties peculiariora ignota fermenta, miasmata, venena, tam in morborum causis atque effectibus, quam in medicamentorum operationibus, nobis imperscrutabilia admittant accusentque. Specifica illa dicunt. Ecquid, quæso, illa aliud, nisi qualitates



tates occultæ? Ecquid hæc ad nos? Fac nos sæpius latere causas primas, ultimasve & remotissimas: modo videamus propinquiores. Pone & has & illas nos plane fugere a priori, modo eas a posteriori attingamus.

### §. XII.

Sed propius & applicatius ad rem præsentem. Quid, quæso, purpuræ causa intellectu dictuque facilius? Quis adeo rudis in physiologicis & anatomicis, quis tam cæcus, quin videat, causam hujus mali materiale esse laticem seroso-lymphaticum, formalem ejus in perigraphia corporis congestionem, stagnationem & retentionem. Ibi nos id docet autopsia ad lectos ægrotorum. Huc nos ducit chemicis & anatomicis principiis suffulta Physiologia. Serici & lymphæ indoles, crasis, ad corruptionem proclivitas ex Chemia anthropologica nota est. Ejusdem viæ ex Anatome cognitæ hodie sunt. Inde aberrans in aliena loca deferitur, huc delatus corruptionem concipit, vel, quod melius, acrem quidem, sed non putredinosam, vel, quod pessimum, putredinosam plane. Hinc explicatu faciles evenientes inde utrinque effectus, ad ultimum usque, non modo tristem, mortem puta, sed & haud raro ad exoptatum finem, firmiorem scilicet sanitatem.

### §. XIII.

At enimvero non tantum retro, sed & antrorsum euntibus planior parata est via, ætiologica nempe. Qui fiat,





fiat, si quæris, ut ad hæc loca deferatur, in iis accumuletur purpuræ materia. Id efficit non purus putus quidem *Mechanismus*, neque *Stahlianismus*, sed diviniolibus legibus constitutus *organismus* corporis nostri organici. Atat hoc ipsum est, quod nos maxime latet, regeris. Ad rem præsentem traho responsionem. Quem veri nominis Medicum hodie amplius latent feri & lymphæ viæ & utriusque per illas secretiones secretorumque horum humorum itinera, receptacula ductusque tam, quod retinendum est novisque usibus impendendum revehentes, quam quod vel abundat vel qualitate peccat forâs ejicientes. Quem fugit amplius dictarum viarum perpetuus in sanis ægrisque consensus. Aucto urinæ fluxu imminui, imminuto augeri perspirabilem laticem, hoc imminuto augeri & aucto pariter imminui illum, atque horum motuum directiones arti medicæ quoque relictas esse, a priori æque ac a posteriori hodie evictum est & cognitum adeo inferioris subfellii Physicis & Medicis.

#### §. XIV.

Inde (§. XIII.) consequitur omnino, purpuræ materiam ad urinæ vias dirigi posse, & ad artis nostræ regulas actu dirigi quam felicissime. Ecce L. B. summam causæ, quam agimus, ecce ratione & experientia stabilitum methodi, quam commendamus, fundamentum.



## §. XV.

Ex præstructis (§. XII — XIV.) planis omnibus ac facile obviis principiis facile porro dijudicari possunt variae variorum de purpura sententiæ. Ita conciliari potest eorum sententia, qui purpuræ indolem esse dicunt salino-sulphuream, quam odore seu potius fœtore, quem spargit, prodere dicunt. Inde explicari potest, quod asserit HAMILTON, qui salino-sulphuream materiam negat, eique acidam acrimoniam substituit, quam ex urina decolore sanorumque similiore, ejusque largiori excretionē tenui, pallida, ex ptyalismo sæpius occurrente, ex vesiculis sero plenis, ex calore non adeo intenso, ex proficuo absorbentium & noxio acidorum medicamentorum usu, ex tardiori horum exanthematum præ aliis expulsionē, ex sanguine coagulato in subjectis hac febre defunctis ope sectionis reperto, conjectat.

## §. XVI.

Neque minus ex præcedentibus intelligitur theoria FRIDERICI HOFFMANNI in *System. Medic. ration. T. IV.* qui utramque assumit qualitatem peccantem, salino-sulphuream pro causa purpuræ rubræ venditat, acidam vero causæ purpuræ albæ assignat. Id quod HAMILTON ipse innuere videtur in *tractatu de febre miliarī L. III. p. 53.* inquiens, *ubi pustulæ rubræ miliaribus sunt interspersæ, omnia symptomata febrem ardentem magis ostendunt*, in eodem vero capite disertis verbis pronuntiat, *in febre ardente sanguinem particulis salino-sulphureis imprægnari.*

## §. XVII.





## §. XVII.

Febris aut causa purpuræ existit, aut hujus effectus est. Utriusque phænomeni cognitio ætiologica admodum evidens est. Febris ut qualiacunque fluida exagitat, ita & seroso-lymphaticum humorem concitat, turbat, ad aliena loca urget, sic proinde a deposito abundanti & stagnanti fluido in peripheria cutis pustulæ formantur purpuracæ. Quando contra febris purpuræ effectus est, res ita se habet: Vel retrocedit materia purpurea, atque in massam sanguineam suscepta hanc inficit, ejus crasin turbat, sicque motum intestinum concitat, præterea fluxu sanguinis ad omnes corporis partes unà delata ubique opplet, premit, irritat, motumque progressivum accelerat, vel non absorpta extra vasa sanguifera stagnans hæc iterum lacescit, gravat, comprimit, quibus modis omnibus partes sensiles moleste sollicitantur, fluxus cruoris impeditur, impeditus in progressu suo sanguis retro fortius urgetur, unde tota massa in motum concitatur, pulsus augetur, redditur celer & frequens, nonnunquam infimul plenus, tensus, durus.

## §. XVIII.

Reliqua jam planiora fluunt. Plenitudines, spissitudines & dyscrasiæ ut communiores plurimorum morborum iterum morbosæ existunt causæ, ita huic præsertim malo inferendo præcipue favent. Quicquid proinde opplet, infarcit, obstruit, densat, commovet, serosoque



lymphaticam diathesin infert; purpuræ causa existit remotior. Huc ergo referenda sunt: otiosa vitæ genera maxime sub lautiore diætâ, alimenta acria, aromatica, crassa, vel etiam tenuissima sed justo plus nutrientia, potulenta calidiora, spirituosâ, sulphurea, non bene fermentata nec defœcata, vel etiam purissimorum justo largior usus, abusus; potus insufficiens; nimia corporis exercitia.

### §. XIX.

His præcipue addendæ sunt suppressiones omnis generis excretionum. Suppressa in sexu sequiori menstrua ut multorum malorum lernam constituunt, ita producendis efflorescentiis amplam largiuntur occasionem. Sanguis enim secundum WILLISIVM in *operibus medic. & physic. L. XVI. p. m. 182.* a menstribus diu suppressis non modo turgescit, ejusque partes sulphuræ nimis evectæ incendio aptiores redduntur, verum insuper cruoris massa particulis valde fermentativis imbuitur, adeo ut, velut miasmate venenato tacta, effervescens statim versus putredinem & inordinationes corruptivas ipsa disponatur. Eadem ludunt dramata suppressa in fœminis lochia, vel saltim justo parcius manantia. Sanguis ad gravidarum uterum advectus non omnis in fœtus alimentum consumitur, hinc ob abundantem sanguinem uteri cellulosa & vasculosa compages expanditur, fit congestio, sanguis tardius ibi movetur & difficilior, crassus evadit & fœculentus, qui tandem excluso partu, singula si rite succedant





dant, lochiorum fluxu evacuatur. Si itaque hic cruor aut non sufficienter aut plane non eliminatur, inverso motu in vasa majora & viscera nobiliora transit & resorbetur, magnamque sero & lymphæ infert anomaliā.

§. XX.

Transpiratio insensibilis æque ac sudores sufflaminati quam plurimis non modo favent cutis defœdationibus producendis, sed exanthematibus etiam miliaribus fomitem præbent. Nimii pariter sudores, cum partes lymphaticas & serosas nimis absumant, partes temperatas exhauriant, ut acriores magis in apricum prodeant, hujus mali existunt causæ. Alvus, præsertim in febribus acutis, diutius cohibita, quatenus excrementitii succi, in intestinorum latebris reclusi, in humorum massam recipiuntur, suum quoque confert symbolum. Producent porro purpuram variæ aëris constitutiones, aër inprimis nebulosus, pluviosus, effluviis putridis & noxiis repletus exhalationibus, nec minus subitanæ aëris vicissitudines. Vigiliæ diu protractas nec non somnum nimium, animi pathemata, in subjectis præsertim obvia sensibilibus, purpuram procreare, vero verius est. Nec nimium sanguinis sub abortu & mensium excessu profluvium a causis remotioribus excludendum est. Etenim a nimia sanguinis jactura solidorum robur valde debilitatur, hoc labefactato lentius progreditur fluidorum cursus, se- & excretiones non legitime succedunt, hinc cruditates in corpore & fordes accumulantur. Gravidæ deni-



que teste FRIDERICO HOFFMANNO in *System. Medic. ration. T. IV. p. 105.* quæ sub sedentario vitæ genere neque medio gestationis tempore, neque ultimis mensibus nimiam vasorum plenitudinem sanguinis detractione minuunt, in puerperio constitutæ puerperæ purpurea hac labe infestantur.

### §. XXI.

Suppressionem diarrhœæ, coryzæ, ulcerum fœtidorum diu manantium, adstringentium abusu improvide cohibitum fluorem album, retropulsionem purpuræ chronicæ, scabiei, tineæ, secuta esse exanthemata hæc, observare est. Sub instante patu medicamenta pellentia fortiora, volatilia, adhibita sæpe sæpius purpuram post se traxerunt.

### §. XXII.

Usam quin potius abusum Coffee ad purpuram disponere, multi contendunt, adferentes, humorum massam ab hoc decocto intensius commoveri, & sudorem impelli, adeoque sulphure illo empyrevmatico, quo fabas Coffee tostas pollere dicunt, purpuram ingenerari. FRIDER. HOFFMANN reputat, ideo nocere potum Coffee, quoniam ab hoc calide assumpto potu, dum sudorem pellat, alvus supprimatur, ut inde calore, quem excitat, præsertim in illis corporibus, quæ multis scatent impuritatibus, fordes biliosæ salino-sulphurææ magis attenuentur, atque per vasa lactea & lymphatica ad massam humorum defe-



deferantur. E contrario IO. GE. GMELIN in supra laudata *Diff. de febre miliari* potum hunc tantopere non damnat, cum præter gummosas quasdam & olei empyrevmatici subtiliores partes paucissimas infusum Coffee nil aliud ingreditur, ideoque mala, quæ inde nascantur, incongruæ præparationi aliisque abusibus adscribit.

### §. XXIII.

Denique causis procatarcticis notabilis alicujus visceris inflammatio eo magis annumeranda venit, quod secundum WERLHOFFUM in *observat. de febr. p. m.* 293. saltem læsioni tendinis ab infelici venæsectione, atque alii a læsione intestini recti per siphonem clysmaticum inepte intrusum febris miliaris supervenerit. Abusum camphoræ producere exanthemata, plus una vice expertus sum. Plures adhuc enumerari possent causæ, sed, ne limites transgrediar, sufficiat allegasse præcipuas.

### §. XXIV.

Consideratis paulisper iis, quæ generationi hujus mali ansam præbere possunt, ad signa attendamus, ex quibus hunc morbum dijudicare valeamus. In pathologicis signa duplicis sunt generis, alia nempe primaria, quæ huic vel illi morbo sola præcisè competunt, alia secundaria, quæ non in hunc vel illum morbum sola cadunt, sed multis aliis sunt communia.

### §. XXV.



## §. XXV.

Signa primaria indicata (§. III.) purpuræ differentia specifica jamjam manifestat. Communiora & secundaria imminentis & præsentis purpuræ fere sunt sequentia: Præcedit levis horripilatio, quam mox excipit corporis exæstuatío, interdum non adeo vehemens, aliquando frigus & æstus alternant, aliquando calor est valde intensus; facies admodum rubicunda comparet, oculi splendent, scintillant, caput turbatur; inquieti sunt ægri, accedunt vigiliæ, vix unam alteramve horam absque interruptione dormiunt, somnus est laboriosus, non reficiens, sed delassans potius; pulsus & urina mirum variant, mox frequens est & fortis, durus, contractus, mox tardus & debilis, urina nunc spissa & turbida, nunc clara imo aquæ instar tenuis apparet; sudores sæpe nulli, sæpe colliquativi; alvus ut plurimum constipata est, nonnunquam suo respondet officio, interdum supervenit diarrhœa. Horum vero exanthematum mox subsecuturam eruptionem præcise præsagiunt oppressio pectoris, tussicula sicca, respiratio difficilis, anxia & profunda suspiria, ad lipothymiam usque sæpe affligentia, deliria, æstus & compunctorius in dorso sensus, ardor & pruritus in cute. Hæc symptomata tamdiu protrahuntur, donec sub insigni pruritu & colore cutis in rubro-purpureum vergente erumpant hæc exanthemata numerosissima, modo alba, modo rubra, modo utraque inter se permixta, primum in collo & pectore, deinceps in dorso, abdomine, brachiis, pedibus conspicua.

## §. XXVI.



## §. XXVI.

Accidit autem eruptio hæc diversis temporibus, ut vix certus, status, ac determinatus ipsi assignari possit terminus. Inde est, quod Autores pariter in definiendo eruptionis tempore non conveniunt. HAMILTON decimo vel undecimo die a principio plerumque pullulare pustulas, HOFFMANN quarto vel quinto ab invasionis die, alii alio has efflorescentias emicare dicunt.

## §. XXVII.

Compurentibus nunc in summa cute exanthematibus graviora ante pathemata mitigantur. Pulsus, licet celeritatem pertinacius nonnunquam servet, durus tamen antea tensusque melior evadit, animo vigor dejectus redit, cutis arida madescit, sudores antea colliquativi nunc parciore sunt, alvus obstructa laxatur, vesiculæ sensim sensimque explicantur, urina magis saturata prodit, sudoris odor singularis & huic exanthemati proprius magis sese prodit; lochia in puerperis suppressa redeunt; nunc intra quatuor, nunc intra septem, plurimumve dierum decursum cum pruritu insigni exanthemata disparent, arescunt, squamarum instar decidunt, cute & cuticula subscabra manente, tumque ægri, vires sensim recipientes, pristinam recuperant sanitatem.

## §. XXVIII.

Longe vero aliter se gerit purpura maligna. Etenim symptomata modo (§. 25. & 27.) recensita non modo diutius persistunt, sed omnia ingravescent symptomata. Vigiliæ, inquietudines animi & corporis augentur, respiratio fit difficilior, vires magis magisque prosteruntur.



Sequuntur deliria nunc continua nunc interrupta, tremunt artus. Vigiliis excipit ominosa somnolentia, hanc lethargus denique. Urina, coloratior ante & crassior, mox tenuis & pallida evadens, diarrhœæ excedentes, fere colliquativæ, sudores excedentes, deficiens omnis doloris sensus, pulsus præsertim debilis, tremulus, intermittens, certam malignitatem summumque inde pendens periculum vitæ ominantur.

### §. XXIX.

Quod ad Prognosin heic sistendam attinet, tenendum est, tam insidiosam sæpius esse purpuram, ut vix aliquid certi de ejus constitutione & consecutione prænuntiari possit. Magna igitur Medico opus est circumspectione in præsa- giendo eventu vel optato vel funesto. Salutis spem faciunt urinæ, quæ ab initio fature aureo colore tinctæ sensim sensimque turbantur, tandem secundo tertiove ab eruptione die copiosum deponunt sedimentum aut bolare, lateritium rubrum, aut, quod frequentius accidit, molle, album quasi farinosum. Melioris quoque indolis est, si ante & post exsiccationem erumpit sudor blandus, æqualis. Cessatio symptomatum sub diagnosi recensitorum post eruptionem exanthematum, atque febris remissio bona præbent indicia. Efflorescentiarum nimis languida eruptio, recessio vel retropulsio, nulla his retropulsis iterumque expulsis symptomatum inde natorum mitigatio, sane exoptatum haud spondent eventum, magis funestum vero prænuntiant, si firmissime intus obhærescente materia peccante interiora ardent, & extrema rigida strictura detenta copioso frigido sudore perfunduntur, aut si vicissim



extrema æstuant, & in abdomine notabilis refrigerationis sensus percipitur. Diarrhœa, urinæ copiosiores, tenues, nimia sudoris profusio, respiratio difficilis, tremor linguæ, subsultus tendinum, exanthemata modo comparentia modo disparentia, major defectus virium, vigiliæ pertinaces, mala ominentur.

### §. XXX.

Utrum vero alba rubrave periculosior sit, quærere hic fas est. Vulgo tantum non omnes Pathologi albam semper ominosiores pronuntiant. Contrarium vero loquitur experientia. Mea hic superior autoritas hoc stabiliat assertum. Recentissimus fundamentorum pathologicorum atque therapevticorum stabilitor Cel 10. FRID. CARTHEVSEVS in suis *Patholog. & therapie fundamentis* Tom. II. S. VII. C. VII. §. IV. p. m. 648. ita hanc edisserit experientiam: *Febres purpuratæ frequentius quidem homines juniores, otiosos, laute viventes, plethoricos, temperamento sanguineo & cholericò - sanguineo, habitu corporis spongiosiori præditos, fœminas itemque hystericas & puerperas invadunt, subinde nihilominus, præsertim si vernali, uti crebrius fieri solet, vel alio etiam tempore epidemice grassantur, nulli ætati, sexui, ac temperamento parcunt, sed præsentem eminentiori aëris vitio, ac valde simul adjuvante facili contagio, communem stragem edunt, ita tamen, ut purpura alba tunc temporis semper periculosior magisque lethifera, quam rubra deprehendatur. Scio quidem, vulgo purpuram albam quovis tempore & apud quævis subiecta æstimari deteriore;* at scio etiam, opinionem hanc experientiæ refragari. Nam ipse plus simplici vice observavi, purpuram al-

D 2

bam,



*bam, præsertim urticatam, adeo fuisse mitem atque benignam, ut nullus plane periculi metus subnasci potuerit.*

### §. XXXI.

Plura præmissis (§. XXIX.) addi possent semiologica, quæ vero sicco præteribo pede, utpote ab aliis & nominatim a FRIDER. HOFFMANNO & HAMILTON fusius descripta.

### §. XXXII.

Methodi purpuræ medendi rationem supra (§. XIII.) dedimus, superest, ut, quomodo hæc administranda sit, indicemus. *Diuretica* illa est, adeoque ad peripheriam pellenti fortiusque diaphoreticæ & alexipharmacæ plane contraria, quæ quo nocentior, eo magis removenda est. Haud difficulter intelligimus, diaphoretica, calida medicamenta, quatenus sanguinem exæstuant, & liquida majori velocitate versus cutis peripheriam determinant, plus damni inferre quam emolumenti. Materia peccans firmiter impacta hæret vasis cutaneis, obturata sunt hæc vasa. Quæcunque igitur obstructionem in vasis cutaneis augent, peccantem ibi accumulunt materiam, majora inducunt incommoda. Jam vero diaphoretica calida medicamenta liquida majori vi versus locum obstructum appellant, hinc eorum, inter duo quasi prela opposita prefforum, liquidissima transibunt necessario, crassiora manebunt, liquida, quæ secundum suam naturam in concretionem tendunt, fluiditate sic orbata majorem nanciscuntur cohæsionem, adeoque non possunt non augere obstructionem. Tam fabulosum est vulgare illud dictærium, venenum a corde de-



depellendum esse (man müsse das Gift vom Herzen treiben) ut in aliis morbis exanthematicis, ita in hoc maxime.

§. XXXIII.

Diuretica potius illis hactenus usitatis bezoardicis substituenda sunt, quæ ex indicata ratione utramque paginam hic absolvunt. Vasis cutaneis impacta hæret materia purpuracea. Hæc attenuanda, & quoad licet, ad exitum præparanda. Verum usque tamen attenuari nequit, ut omnis per cutis spiracula exire possit, quæ sola subtiliora transmittunt. Crassior pars per urinae vias derivanda & expellenda est. Hoc diuretica faciunt.

§. XXXIV.

Diuretica autem ea sunt medicamenta, quæ sanguinis fluxum ad renes magis quam ad alias corporis partes pellunt, nec sub hac efficacia multum vel in vasis vel in liquidis mutant. Ex diureticorum catalogo enim ea eligenda sunt, quæ leviter irritant, potenter tamen resolvunt, solutaque & ad se- & excretionem hanc præparata revulsionis beneficio sollicitant & determinant. Hic nitrum primum occupat locum, tanquam potentissimum resolvens & diureticum. Nec spernenda sunt reliqua salia media, in quorum tamen multitudine selectu opus est.

§. XXXV.

Salia, quæ alcalinæ indolis sunt, vix ac ne vix quidem, nisi in purpura chronica & acuta benigna, admittuntur, in maligna nunquam. Malignitatem illa augment, quia conceptum putredinis motum accelerant, fusumque jam hoc motu sanguinem celerius fundere juvant. Salia acida hic potius conducunt, utpote optima antiputredino-



nosa, quæ vero in purpura acuta benigna pessime darentur, quoniam jam spissa spissiora reddunt. Excipiendus tamen hic est ille casus, ubi nimium sulphur cholericum calorque febrilis id suaderet. Sed & tum parcius danda sunt acida.

#### §. XXXVI.

Nolo jam fusius recensere diuretica, quæ nobis vegetabile suppeditat regnum, utpote omnibus jam nota. Hoc unicum addo. Squilla in quacunque tutiori formula data omnibus efficacioribus diureticis hîc præferenda est. Visi sunt ejus effectus, qui omnem superarunt expectationem. Sed caute cum illa mercandum.

#### XXXVII.

Ex animali regno nulla habeo, quæ commendare possim, diuretica. Millepedibus alia tutiora quin plus efficacia minusque nauseosa substitui possunt. Sed quid de cantharidibus? Usus eorum internus dissuadendus omnino est. Deglutiti cantharides justo fortius agunt, & internas partes facile rodunt. Tutior est eorum usus externus in vesicatoriis. In his corrodunt cuticulam, viam ita sibi parant ad porulos cutis, per hos descendunt ad humorum massam, sic satis in ea diluti resolvunt, viis urinæ occurrentes has potenter quidem sed sine damno irritant, & fluxum lotii copiosorem provocant. Annuit dictis experientia. In sensibilibus enim subjectis & delicatulis mucilaginosus & emulsivus cavendum est, ne stranguria afficiantur. Quod enim per arrosam cutim effluit, parum est, nec tantam opem præstat, quanta ista vulgo putatur. Diureticæ vesicatoriorum efficaciam & viscerum ab illis resolutioni





lutioni tribuendus est tantus effectus, quem si ob oculos habuissent Medici, in multis curationibus, purpuræ maxime, feliciores citius fuissent.

§. XXXVIII.

Sed frustra hæc omnia porriguntur, aut plane dam-nosa sunt sine diluentis liquidi copia. Quin haud incon-grue dixerim, liquida largius epota efficacissima esse diu-retica & diluentia.

§. XXXIX.


Sed viam & exitum non invenit fluidum etiam ad re-nes determinatum, nisi strictione in hac regione tollantur, partesque laxentur. Revulsioni itaque procurandæ adden-da sunt emollientia, epispastica, clysmata, (per quæ unâ alvus stricta tuto referatur) aliaque relaxantia regioni lum-bari & pubis applicata. Sic enim soluto spasmodum obice effluit per laxata vasa latex ille eliminandus.

§. XL.

De venæsectione, de antifebrilibus cum diureticis nonnunquam miscendis, de diæta & regimine convenien-te, de methodo plurimis aliis symptomatibus obviam eun-di nil habeo, quod addam, qui, ut supra monui, non in-tegram de purpura doctrinam scribere volui, sed tantum diureticam purpuræ applicandam methodum commendare institui, cum ista omnibus nota sint, & in omnibus legantur Medicorum scriptis.

§. XLI.

De purpura retrocedente tantum quædam monenda sunt. Ut camphora purpuram progignit, ubi sine hac mi-seri ægri febribus suis felicius liberari potuissent, ita fune-  
stus



stus ejus ibi usus docet necessarium in hoc casu usum. Tum vero non unum alterumque granum reliquis immiscere oportet, sed ad 5. & in casu necessitatis ad 10. usque ascendere licet. Sic enim capta una alterave dosi repullulant hæc exanthemata, postea missa camphora mitiori methodo & regimine tractanda.

#### §. XLII.

Nec hic plane præterire possum eorum opinionem, qui purpuræ retrocessionem a quacunque revulsione metuunt, ideoque nec sanguinis copiam excedentem detrahere, nec alvum suo officio immorigeram admonere audent. Quam inanis autem sit eorum metus, EX IUNCKERI *Dissertat. de purpura alba maligna & benigna an. 1731. Halæ Magdeb.* habita clare elucescit. Inquit ille, quodsi *V. S.* primo vel secundo die morbi, præcipue in subjectis plethoricis & adfuetis, instituat, eximiam utilitatem illa comprobat. Eruptionem exanthematum faciliat, variaque fontica symptomata avertit. Si vero purpura jam adest, cautius mercandum. Alvus autem diutius obstructa reservanda est per clysmata emollientia, hæc enim non stimulant.

Plura defino, rogans æquiorum rerum medicarum judices, ut, quæ hic proposui, æqui bonique consulant, suisque monitis atque observationibus vel corrigant, vel corroborent augeantque. Eum in finem hæc scripta sunt ab imbecillitatis suæ probe gnaro & ubique discendi cupido. Deus incolumes fervet reddatque curæ nostræ commissos, nostraque iis inserviendi studia ad majus in dies evehat fastigium.

